

Uvjereni da zvaničnici izabrani na političke dužnosti moraju svoj rad i djelovanje podrediti zakonitosti i općem javnom interesu, a u skladu s etičkim principima sadržanim u ovom kodeksu;

Smatrajući da se nepoštivanjem tih principa podriiva kredibilitet Skupštine Unsko – sanskog kantona, demokratija i temelji vladavine prava;

Cijeneći da je osnovni cilj usvajanja i promoviranja Kodeksa jačanje povjerenja između izabranih zvaničnika i građana;

Ističući da cjelokupno civilno društvo mora biti uključeno u stvaranje klime povjerenja u rad Skupštine Unsko – sanskog kantona;

Vjerujemo da će etičke obaveze izabranih zvaničnika definirane Kodeksom doprinijeti da izabrani predstavnici zakonodavne vlasti obavljaju dužnost savjesno i odgovorno, uz otvorenost i spremnost da odgovaraju javnosti za svoje odluke.

Shodno odredbama V.A.11. m) Ustava Unsko – sanskog kantona - prečišćeni tekst („ Službeni glasnik Unsko - sanskog kantona“ br. 1/04 i 11/04) i člana 4. Odluke o formiranju Komisije za izradu Etičkog kodeksa izabranih zvaničnika u Skupštini Unsko – sanskog kantona („Službeni glasnik Unsko - sanskog kantona“ broj 23/23) a u vezi sa članom 70. stav (2) tačka a) Poslovnika Skupštine Unsko – sanskog kantona („Službeni glasnik Unsko - sanskog kantona“ br.9/17 i 11/21) na prijedlog Komisije za izradu Etičkog kodeksa izabranih zvaničnika u Skupštini Unsko – sanskog kantona _____ redovnoj sjednici održanoj dana _____ 2024.godine, Skupština Unsko – sanskog kantona usvojila je

ETIČKI KODEKS IZABRANIH ZVANIČNIKA U SKUPŠTINI UNSKO – SANSKOG KANTONA

I. OPĆE ODREDBE

Član 1.

(Opće Odredbe)

Etički kodeks izabranih zvaničnika u Skupštini Unsko – sanskog kantona (u daljem tekstu: Kodeks) ima za cilj jačanje povjerenja između izabranih zvaničnika i građana, jačanje povjerenja građana u državne institucije, moralno i odgovorno vršenje funkcije izabranog zvaničnika u toku mandata u cilju razvoja parlamentarne demokratije i osiguranja javnosti rada Skupštine Unsko – sanskog kantona (u daljem tekstu: Skupština).

Član 2.

(Predmet Kodeksa)

Kodeksom se utvrđuju osnovni etički principi, pravila ponašanja i obaveze poslanika, provođenje kodeksa, Etička komisija, mjere i sankcije, pravo na žalbu, nadzor nad primjenom, izjava o spremnosti i poštivanju kodeksa kao i druga pitanja od značaja za uređivanja pitanja etičnog ponašanja i odgovornosti izabranih zvaničnika.

Član 3.

(Cilj Kodeksa)

(1) Ovim Kodeksom uspostavljaju se standardi ponašanja koji se očekuju od izabranih zvaničnika u obavljanju njihovih prava i dužnosti.

- (2) Ovim Kodeksom se također građani upoznaju o standardima ponašanja koje spravom mogu očekivati od izabranih zvaničnika.

Član 4.

(Primjena Kodeksa)

- (1) Ovaj Kodeks se odnosi na izabrane zvaničnike u Skupštini Unsko-sanskog kantona.
(2) Principi i pravila ponašanja ustanovljeni ovim Kodeksom primjenjivaće se na sjednicama Skupštine, sjednicama njenih radnih tijela, međusobnoj komunikaciji, komunikaciji sa predstavnicima drugih nivoa vlasti, komunikaciji sa drugim licima, javnošću i svim javnim istupima, uključujući i istupe na društvenim mrežama.

Član 5.

(Definicija javnog prostora)

- (1) Definicija javnog prostora u smislu ovog Kodeksa su prostorije Skupštine i svi drugi prostori u kojima se održavaju aktivnosti i događaji koje organizira Skupština.
(2) Javnim prostorom smatraju se aktivnosti zastupnika u svim vrstama medija, društvenim mrežama i drugim internet platformama na kojima je moguće utvrditi identitet izabranih zvaničnika.
(3) Izabrani zvaničnici za skupštinskom govornicom koristiće jedan od službenih jezika koji je u upotrebi u Bosni i Hercegovini.

Član 6.

(Rodna ravnopravnost)

Izrazi upotrijebljeni u ovom kodeksu navode se u jednom gramatičkom rodu, i bez diskriminacije se odnose i na muškarce i na žene.

Član 7.

(Značenje izraza)

U smislu ovog Kodeksa, pojedini upotrijebljeni izrazi imaju sljedeće značenje:

- "izabrani zvaničnik" u smislu ovog Kodeksa smatra se poslanik u Skupštini Unsko-sanskog kantona (u daljnjem tekstu: poslanik);
- "sukob interesa" – postoji u situacijama u kojima poslanik ima privatni interes koji je takav da može uticati ili izgleda da može uticati na nepristrasno i objektivno vršenje njegove dužnosti, a privatni interes uključuje bilo koje prednosti za poslanika ili njegovu porodicu i druga lica ili organizacije sa kojima je on imao ili ima poslovne, političke i druge veze;
- "bliski srodnik" – članovi porodice poslanika (bračni ili vanbračni supružnik, dijete, usvojilac, usvojenik i dijete bračnog supružnika) kao i roditelji i braća i sestre poslanika;
- "nepotizam" – favorizovanje osoba koje su familijarno povezane sa poslanikom radi ostvarivanja kakve koristi, zaposlenja ili položaja;
- "kronizam" – pristrasan odnos prema osobama koje su u prijateljskim, drugarskim, političkim, kolegijalnim i drugim sličnim odnosima povezani sa poslanikom radi dodjele poslova, postavljanja na određene uticajne pozicije ili ostvarivanje neke druge koristi ili interesa poslanika;
- "povezana lica" – fizička lica povezana sa poslanikom po osnovu rodbinskih odnosa, poslovnih i drugih odnosa kao i pravna lica povezana sa poslanikom po osnovu ulaganja kapitala i/ili upravljanja pravnim licem, uključujući i bliske srodnike.

II. OSNOVNI ETIČKI PRINCIPI

Član 8.

(Zakonitost i javni interes)

- (1) Poslanici obavljaju dužnost u skladu sa Ustavom, zakonima, Etičkim kodeksom i drugim općim aktima.
- (2) Prilikom obavljanja svojih prava i dužnosti, poslanici će djelovati isključivo u javnom interesu.

Član 9.

(Očuvanje integriteta)

- (1) U svom djelovanju poslanici će, prema svojim najboljim znanjima i sposobnostima, samostalno donositi odluke za koje su nadležni i odgovorni, imajući u vidu najbolji interes svih građana.
- (2) Poslanici ni u kom slučaju neće prihvatiti finansijske ili druge obaveze ili očekivati bilo kakve materijalne i slične privatne koristi od pojedinaca ili organizacija radi opredjeljivanja u pogledu učešća u odlučivanju i radu Skupštine.
- (3) Poslanici će voditi računa da budu prikladno odjeveni kako na sjednici Skupštine, radnih tijela tako i u svim drugim prostorima na kojima se održavaju aktivnosti i događaji koje organizira Skupština.

Član 10.

(Javnost rada)

- (1) Poslanici u Skupštini Unsko-sanskog kantona biće uvijek spremni da javno iznesu razloge za svoje postupke i odluke koje donose, uz izuzetak javnog saopštavanja podataka i informacija u skladu sa ograničenjima propisanim zakonom.
- (2) Poslanici će biti dostupni i neće izbjegavati da pružaju informacije kako o svom ličnom radu tako i o radu Skupštine Unsko-sanskog kantona.

III. PRAVILA PONAŠANJA I OBAVEZE POSLANIKA

Član 11.

(Poštivanje pravila o radu Skupštine)

Poslanik je dužan da se pridržava:

- a) tačke dnevnog reda o kojoj se diskutuje,
- b) da se prilikom svog izlaganja suzdrži od bilo kakvih uvreda,
- c) da se prilikom svog izlaganja pridržava vremena određenog za diskusiju,
- d) da se suzdrži od replika koje se ne tiču tačke dnevnog reda,
- e) da u skladu s poslovníkom iznosi povrede poslovníka navodeći član poslovníka koji je povrijeđen,
- f) da prilikom ispravki krivog navoda, vodi računa da se ispravka krivog navoda odnosi na tačan navod koji se ispravlja, bez mogućnosti produblivanja diskusije odnosno rasprave,
- g) da ne ometa rad na sjednici, razgovarajući sa drugim zastupnicima ili na mobitel,
- h) da se prilikom glasanja izjasni o svim tačkama dnevnog reda,
- i) da u toku sjednice ne pravi česte pauze koje bi dovele u pitanje kvorum za održavanje sjednice,
- j) da se pridržava utvrđenih termina za održavanje sjednica i pauza u toku sjednice,
- k) da se suzdrži od dobacivanja i upadanja u riječ u toku izlaganja drugog poslanika.

Član 12.

(Zabrana diskriminacije)

Poslanici su dužni da se u obavljanju svojih dužnosti i prilikom donošenja odluka suzdrže odbilo kakvih oblika predrasuda ili diskriminacije u odnosu na rasu, vjeru, pol, nacionalnu ili etničku pripadnost, političku opredjeljenost, starosnu dob, bračni status, seksualnu orijentaciju, socijalno-imovinski status i svaku drugu različitost.

Član 13.

(Uzajamno poštovanje i komunikacija)

- (1) U međusobnoj komunikaciji, kao i komunikaciji sa drugim licima i javnošću, poslanici će u svakom slučaju istupati sa uvažavanjem i poštovanjem, njegovati kulturu dijaloga i razmjenu misli i ideja.
- (2) Poslanici neće koristiti neprimjerene izraze ili gestikulaciju kojima se može narušiti lični ugled drugih poslanika kao i ugled Skupštine Unsko-sanskog kantona.

Član 14.

(Obaveza informisanja javnosti i saradnja sa medijima)

- (1) Poslanici su otvoreni prema javnosti kada su u pitanju odluke koje donose i rad koji obavljaju.
- (2) Blagovremeno će obavještavati javnost putem sredstava javnog informisanja i neće izbjegavati da jasno i javno saopšte stavove i razloge za sopstvene odluke i ponašanja.
- (3) Prema zahtjevima medija i građana poslanici će obrazložiti razloge za svaku odluku koju donesu i navesti činjenice na kojima se zasniva donesena odluka.
- (4) Povjerljive informacije koje dobije prilikom vršenja svoje dužnosti, poslanik će koristiti samo u vezi s tim dužnostima i objasniti javnosti da su te informacije povjerljive.
- (5) Poslanici će podsticati sve aktivnosti koje imaju za cilj unapređenje javnosti i transparentnosti rada Skupštine.

Član 15.

(Zabrana primanja poklona)

- (1) Poklone u vidu novca, predmeta, prava ili usluga, a u vezi sa obavljanjem povjerene javne dužnosti, poslanik neće tražiti niti primiti, niti neposredno niti putem drugih lica koja budu nastupala u njegovo ime.
- (2) Izuzetak od zabrane iz stava 1. ovog člana mogu biti samo slučajevi predviđeni relevantnim propisima, kao što su protokolarni pokloni, pokloni manje vrijednosti i sl.
- (3) Poslanici su dužni da primljene poklone veće vrijednosti prijavljuju u registar poklona, u skladu sa relevantnim propisima.

Član 16.

(Sukob interesa)

- (1) Kada poslanici imaju direktan ili indirektan lični interes u pitanjima koja Skupština Unsko – sanskog kantona ili institucije izvršne vlasti razmatraju, poduzeće sve kako bi te interese objelodanili prije rasprave i glasanja.
- (2) Poslanici neće učestvovati u glasanju o pitanjima u kojima imaju direktan ili indirektan interes.

Član 17.

(Odgovornost)

- (1) Poslanici su dužni da povjerenu dužnost obavljaju savjesno, odgovorno, u skladu sa propisima, profesionalnim i etičkim principima i da svojim ponašanjem štite ugled Skupštine.
- (2) Poslanici neće ispoljavati bilo kakve oblike favorizovanja, a posebno nepotizma i kronizma.

Član 18.

(Poštovanje budžetske i finansijske discipline)

- (1) Poslanici će poštovati budžetsku i finansijsku disciplinu kojom se garantira ispravno upravljanje javnim sredstvima.
- (2) Prilikom obavljanja svojih dužnosti, poslanici neće preduzimati radnje s ciljem nenamjenskog trošenja javnih sredstava i/ili grantova.
- (3) Poslanici će se suzdržati od zahtijevanja ili primanja finansijske ili druge koristi uključujući i obezbjeđenje sopstvene buduće pozicije, kao i naknade za donošenje odluka, odnosno glasanja koje pogoduje interesima određenog lica, grupe i organizacije.
- (4) Poslanici će se suzdržati od zahtijevanja nagrade za uticaj na dodjelu budžetskih sredstava (javne nabavke, dodjela grantova, jednokratnih novčanih pomoći i dr.).

Član 19.

(Korištenje informacija)

Poslanik će se suzdržati od davanja ili korištenja informacija do kojih je došao u obavljanju svoje dužnosti radi sticanja finansijske ili neke druge koristi za sebe ili za druga povezana lica.

Član 20.

(Zabrana korupcije)

- (1) Poslanici će se u obavljanju svojih odgovornih dužnosti suzdržati od bilo kakvog ponašanja koje bi se, prema važećem domaćem ili međunarodnom krivičnom zakonodavstvu, moglo okarakterisati kao korupcija.
- (2) Poslanici će se suzdržati od poduzimanja bilo kakvih aktivnosti koje bi se mogle okarakterisati kao koruptivne aktivnosti i zloupotreba povjerenih javnih ovlaštenja, a u svrhu sticanja lične koristi kao i koristi bliskih srodnika, primanje ili zahtijevanje bilo kakve finansijske ili druge koristi u vezi sa obavljanjem povjerene javne dužnosti.
- (3) Poslanici će se suzdržati od korištenje službenih ovlaštenja radi ostvarivanja vlastitih interesa.

Član 21.

(Poštovanje zaposlenih)

- (1) U obavljanju svojih dužnosti, poslanici će pokazati puno poštovanje prema državnim službenicima i namještenicima, bez bilo kakvih predrasuda, uključujući one na osnovu političkeideologije, nacionalne, rasne ili vjerske pripadnosti, pola ili bilo kog drugog statusa zaposlenog.
- (2) Poslanici neće tražiti niti zahtijevati od državnih službenika da preduzmu ili propuste da preduzmu neku radnju ili mjeru kako bi stekli direktnu ili indirektnu korist.
- (3) Poslanicima nije dozvoljeno da prijete i povisuju ton na državne službenike i namještenike.
- (4) Poslanici su dužni da poštuju hijerarhiju u radu Službe Skupštine.

Član 22.

(Ograničenje istovremenog obavljanja dvije ili više dužnosti)

Poslanici će poštovati sve važeće propise koji se odnose na ograničenje istovremenog obavljanja dvije ili više nespojivih dužnosti.

Član 23.

(Zabrana seksualnog uznemiravanja)

- (1) Zabranjen je svaki oblik seksualnog uznemiravanja.
- (2) Seksualno uznemiravanje je svaki neželjeni oblik verbalnog, neverbalnog ili fizičkog ponašanja polne prirode kojim se želi povrijediti dostojanstvo osobe ili grupe osoba, ili kojim se postiže takav učinak, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje.

Član 24.

(Zabrana neprimjerenog ponašanja prema prijaviteljima)

Poslanicama se zabranjuje svaka vrsta neprimjerenog ponašanja prema licima koja su prijavila ili namjeravaju prijaviti povredu Kodeksa ili koja su na bilo koji način učestvovala ili će učestvovati u postupku za utvrđivanje povrede Kodeksa ili imala namjeru ponuditi informacije ili dokumente potrebne u postupku utvrđivanja povrede Kodeksa.

Član 25.

(Posebne odredbe)

Poslanicama nije dozvoljeno da:

- a) narušavaju red na sjednici stvaranjem nepotrebne buke,
- b) izazivaju ili učestvuju u fizičkom napadu,
- c) verbalno zlostavljaju i grubo vrijeđaju druge poslanike ili lica u skupštini,
- d) neopravdano kasne, ne dolaze ili napuštaju sjednice.

IV. PROVOĐENJE KODEKSA

1. Etička komisija

Član 26.

(Imenovanje Komisije)

- (1) Skupština uspostavlja Etičku komisiju (u daljnjem tekstu: Komisija) kao stalno radno tijelo Skupštine.
- (2) Komisija ima 5 članova iz reda poslanika.
- (3) Skupština Unsko-sanskog kantona će odlukom imenovati članove Komisije iz stava (2) ovog člana.
- (4) Zbog nesmetanog rada i funkcionisanja Komisije Skupština će istom odlukom imenovati i zamjenike članova Komisije.
- (5) Članovi i zamjenici članova ne mogu biti iz iste političke partije.

Član 27.

(Poslovnik Komisije)

- (1) Komisija će povrede Kodeksa provoditi u skladu sa Poslovníkom o provođenju postupka za utvrđivanje povreda Etičkog kodeksa (u daljnjem tekstu: Poslovník) kojeg donosi Skupština Unsko-sanskog kantona zajedno sa Kodeksom.

- (2) Poslovníkom će se utvrditi nadležnosti i akti komisije, prava i dužnosti predsjedavajućeg i članova, izuzeće, postupak podnošenja i postupanja po prijavama, sankcije, žalba na prvostepenu odluku, javnost rada, registar, izmjene i dopune poslovnika i druga pitanja koja su od značaja za provođenje postupka i rad komisije. Postupak će se provoditi shodno odredbama Zakona o upravnom postupku.
- (3) Pitanja koja ne budu uređena Poslovníkom iz stava (1) ovog člana Komisija će urediti Poslovníkom o radu i Zaključkom Komisije.

2. Mjere i Sankcije

Član 28.

(Izricanje mjera i sankcija)

- (1) Za kršenje Kodeksa izriču se mjere i sankcije.
- (2) Mjere izriče predsjedavajući ili lice koje vodi sjednicu Skupštine ili radnog tijela.
- (3) Lica iz stava (2) ovog člana dužna su izricati mjere objektivno i nepristrasno.
- (4) Sankcije izriče Etička Komisija, nakon provedenog postupka po prijavi.

Član 29.

(Vrste mjera)

Vrste mjera su:

- a) oduzimanje riječi,
- b) usmena opomena,
- c) udaljenje sa sjednice.

Član 30.

(Vrste sankcija)

Vrste sankcija su:

- a) pismena opomena,
- b) jednokratna novčana kazna,
- c) javna opomena sa novčanom kaznom.

Član 31.

(Pojašnjenje izricanja mjera)

- (1) Predsjedavajući ili lice koje vodi sjednicu Skupštine, nakon upozorenja, će za kršenje odredbi utvrđenih u članu 11. tačka a), b), c), d), e) i f) izreći mjeru oduzimanja riječi, dok će za tačke g), h), i), j) i k) izreći mjeru usmena opomena.
- (2) Nakon izricanja mjere usmene opomene dva ili više puta, predsjedavajući može zatražiti od Etičke komisije da razmotri pitanje izricanja pismene opomene.
- (3) Predsjedavajući ili lice koje vodi sjednicu nakon izricanja mjera oduzimanja riječi ili usmene opomene može lice koje je upozoreno udaljiti sa sjednice Skupštine.
- (4) Mjere navedene u članu 29. mogu se izreći svim licima koja prisustvuju sjednicama Skupštine i radnih tijela.

Član 32.

(Pojašnjenje izricanja sankcija)

- (1) Pismena opomena izriče se za kršenje odredbi utvrđenih u članu 12., 13., 14., 15., 16. i 28. stav (3) ovog Kodeksa, a izriče je Komisija nakon provedenog postupka po prijavi.
- (2) Jednokratna novčana kazna ili javna opomena sa novčanom kaznom mogu se izreći za kršenje odredbi utvrđenih u članu 17., 18., 19., 20., 21., 22., 23., 24., i 25. ovog Kodeksa, a izriče ih Komisija nakon provedenog postupka po prijavi.
- (3) Novčana kazna može se izreći jednokratno u visini naknade za prisustvo sjednici.

- (4) Javna opomena s objavljivanjem izriče se na način da se, nakon njenog izricanja, objavljuje na web stranici Skupštine Unsko-sanskog kantona u trajanju od 30 dana. Izricanjem javne opomene poslaniku se odbija 30% iznosa mjesečnog paušala u trajanju od 3 mjeseca od dana izricanja javne opomene.

3. Pravo na žalbu Član 33.

(Pravo na žalbu)

- (1) Protiv Rješenja o izricanju sankcije može se izjaviti žalba Kolegiju Skupštine Unsko – sanskog kantona (u daljem tekstu: Kolegij Skupštine) u roku od 15 dana od dana prijema rješenja.
- (2) Žalba se izjavljuje putem Komisije.
- (3) Komisija neće zasjedati po izjavljenoj žalbi.
- (4) Sekretar Komisije će žalbu sa kompletnim spisom proslijediti Kolegiju Skupštine na odlučivanje.
- (5) Kolegij će donijeti Poslovnik kojim će urediti postupak postupanja po žalbama.
- (6) Članovi komisije koji su ujedno i članovi kolegija neće učestvovati u postupku po žalbi.
- (7) Odluka po žalbi je konačna.

V. NADZOR NAD PRIMJENOM KODEKSA

Član 34.

(Tijelo za praćenje kršenja odredbi Kodeksai nadzora nad radom Etičke komisije)

- (1) Komisija za ustavna, zakonodavno pravna i pitanja evropskih integracija Skupštine Unsko-sanskog kantona (u daljnjem tekstu: Zakonodavna komisija) će pratiti uspješnost primjene Kodeksa kroz rad i ponašanje poslanika, izricanje mjera i sankcija.
- (2) Komisija iz stava (1) ovog člana će po potrebi Etičkoj komisiji predložiti i usvajanje određenih mjera za unaprjeđenje odredaba Kodeksa i etičnog ponašanja poslanika.
- (3) Zakonodavna komisija će pratiti i blagovremenost postupanja po prijavama, na način da u svakom momentu od Etičke komisije može zatražiti usmenu ili pismenu informaciju o stanju zaprimljenih prijava i postupanja po istim.

Član 35.

(Izvještaj o radu Komisije)

Skupština Unsko-sanskog kantona najmanje jednom godišnje razmatra izvještaj Etičke komisije.

VI. IZJAVA O SPREMNOSTI POŠTIVANJA KODEKSA

Član 36.

(Izjava o spremnosti)

- (1) Poslanici će prilikom davanja svečane izjave, potpisati i izjavu kojom izražavaju spremnost da u svom radu postupaju u skladu s odredbama ovog Kodeksa.
- (2) Tekst izjave glasi: „Ja _____ iz _____, poslanik u Skupštini Unsko – sanskog kantona, upoznat/a sam u cijelosti sa odredbama Etičkog kodeksa izabranih zvaničnika u Skupštini Unsko – sanskog kantona, kao i odredbama Poslovnika o provođenju

postupka za utvrđivanje povreda Etičkog kodeksa i spreman/a sam da u svom budućem radu postupam u skladu sa istim, što i ovjeravam svojim vlastoručnim potpisom“.

- (3) Izjava o spremnosti je sastavni dio ovog Kodeksa.
- (4) Obrazac izjave o spremnosti ovjerava se u lijevom gornjem uglu otiskom pečata Skupštine Unsko – saskog kantona.
- (5) Potpisivanjem izjave poslanici su spremi da lično odgovaraju za donošenje odluka, ponašanje i spremnost da se izvrši svaki nadzor nad njihovim radom ili provede postupak u skladu sa zakonom, Kodeksom i funkcijom koju obavljaju u Skupštini.
- (6) Lica na koja se odnosi Kodeks su odgovorna za njegovo poštivanje i mogu snositi sankcije za njegovo kršenje.
- (7) Poslanici u mandatu 2022-2026 potpisaće Izjavu o spremnosti nakon stupanja na snagu ovog Kodeksa.

VII. ZAVRŠNE ODREDBE

Član 37.

(Izmjene i dopune Kodeksa)

Etička komisija priprema i Skupštini Kantona predlaže izmjene i dopune Etičkog Kodeksa.

Član 38.

(Prestanak važenja ranijeg kodeksa)

Stupanjem na snagu ovog Kodeksa prestaje da važi Kodeks ponašanja poslanika u Skupštini Unsko – saskog kantona („Službeni glasnik Unsko – saskog kantona“ broj:11/07).

Član 39.

(Stupanje na snagu)

Ovaj Kodeks stupa na snagu danom donošenja i objaviće se u "Službenom glasniku Unsko – saskog kantona" i web stranici Skupštine Unsko – saskog kantona.

Broj: _____
Bihać, _____

Predsjedavajući Skupštine
Unsko-saskog kantona
Zikrija Duraković



U skladu sa odredbama člana 36. Etičkog kodeksa izabranih zvaničnika u Skupštini Unsko – saskog kantona dajem sljedeću

IZJAVU

Ja _____ iz _____, poslanik/ca u Skupštini Unsko – saskog kantona, upoznat/a sam u cijelosti sa odredbama Etičkog kodeksa izabranih zvaničnika u Skupštini Unsko – saskog kantona, kao i odredbama Poslovníkom o provođenju postupka za utvrđivanje povreda Etičkog kodeksa i spreman/a sam da u svom budućem radu postupam u skladu sa istim, što i ovjeravam svojim vlastoručnim potpisom.

Bihać, _____ . godine

Vlastoručni potpis
